

I 226.7

4

惜陰軒詩草



像 肖 人 主 軒 陰 惜

## 黎序

世稱不朽者三而言乃與德功並著所謂言者謂能發明道義表章事實推闡學術增進智識其有裨於世道人心至重以鉅非謂尋章摘句數黃儷白徒侈雕蟲之技以炫耀世俗已也有唐以來如東野遊子之吟次山賊退之作蘇州流亡之句公垂憫農之篇其人之詩名雖未必與李杜韓白相埒而其詩之悱惻動人言皆有物雖李杜韓白無以過之

文齋先生以孝廉捷部試籤分度支主政民國改建作牧歸綏返里復膺省會議員之選其理財財政親民事議國是之章章在人耳目者誠如東坡所云此老於詩外大有事在固不僅以詩傳者卽以詩論集中如關地理之辨惑豐滄雜詠之憂時夢母之孝思地震之寄慨令人讀之凜然而色變惻然而意動固非陳亦韓所謂詞采彌工情實彌隱波瀾彌富義禮彌消者所可同年而語也

先生嘗取所作徵序於余余以簿書期會之冗久未有以應也而

先生遽以疾逝嘆吾人生死之夢幻覩泰山毫芒之存在則是草也固不可不亟付手民以永其傳嗟呼先生之傳其自有可傳之作以見重於當世也余烏足爲

先生重哉是爲序湘南黎丹雨民甫譟

# 朱序

民國十一年冬

文齋先生自河陰歸里，出惜陰軒詩草示余。時朔風吹雁，有聲爐火，熒然讀數十篇，不釋手。先生病初愈，意氣慤懃，曰：子其爲我序之，久無以應。今

先生下世，哲嗣幼文將以遺詩付梓，追維曩事，悵惆久之。先生詩清真而不綺靡，莊雅而不冶妍，其至者輒復激昂慷慨，流連徘徊，不竭其情意不止。夫詩本於性情，情真而詩乃不虛作。先生之詩，殆皆發於性情者乎？先生不僅長於詩，且優於文，其列議席也，則著嘉謨，其縮縣符也，則多善政，而興教育，主度支，皆卓然有建樹在。先生出其所學以施於國家社會者，固比詩尤多也。卽以詩而論，如豐州、滄中、河陰諸雜詠，就其是非得失，以爲美刺，皆於民風政事有關，雖未得見先生者，讀其遺詩，猶得想見其懷抱。此則可傳於後世矣。滄中在今日，有世外桃源之稱，韻士騷人，樂以詩酒譚讌，風流文采，焜耀一時。此後或更有高會而

先生逝矣，可勝今昔之慨哉。

民國十四年春月湘潭朱炳謹序

古詩美刺皆因係民風國政故時君  
采之可以知得失自致正自建安尚風流  
齊梁爭綺麗詩始不切於人事惟香山  
樂府崛起八代之後直追六義之風而千  
載沉迷知音無幾迄乎今日新體詩歌異  
軍特起舊製篇什萬流皆湮而香山之  
詩獨有千古久而愈新豈不以幻則速朽

真則常存乎余讀

文齋先生惜陰軒詩外至湟中雜詠諸作  
歎其蒿目時艱愴懷民隱頌言譏切無所  
回護蓋得香山寫真之旨 先生績學力  
行刊落聲華故其流露於詩者亦如其人  
不屑以朝風月弄花鳥見長也憶湟中雜  
詠作後逾年 馬關臣鎮使即罷苦買雞



釐除積弊出自愛民之淵衷而詩歌流  
傳成為風氣未必無回天之力信乎仁人之  
言其利溥哉方是時軍人徧天下莫不版  
民以廷報章指斥不遺餘力皆懷如充耳  
然後知作詩能切人事者固難采詩以自  
攷正者尤難也聊弁簡端歎息彌日甲子  
孟秋天水周希武謹序



## 自序

煥章籍隸邊陲天生笨伯一切學問少不如人至於聲律駢儷之作尤非所長故雖偶爾操觚而旋作旋軼並未積成卷軸民國八年歲在己未我

兩民觀察湘南黎公以晚晴蓀徵詩之故搜羅渥中諸先輩著作呈遞當道並索及煥章詩稿在

黎公虛懷若谷殷然抱葑菲不遺之思在煥章譴陋自慚何敢覲顏獻醜騰笑於海內名流顧屢辭不獲殊切悚惶因憶隨園友人仲燭庭有言曰但使我輩身後尙有數卷文集被人吹毛索瘢便是天地間尙有此人否則付之草亡木卒而已其言最爲沈痛遂存附驥之心頓忘續貂之譏搜集舊稿匯訂一冊貢諸

黎公以資轉呈至簡篇之寥落詞章之陋劣所不計也時民國八年卽己未八月仲秋文齋李煥章識

# 惜陰軒詩草

滄中李煥章著 男成蔚校字

## 五言古詩

文峯聳翠 有序

環滄皆山也惟南有一峯翹然特出超越諸山夏秋遠觀鬱乎蒼蒼其峯端尖銳宛若筆穎遂錫嘉名爲文筆峯府志載滄中八景文峯聳翠其一也

此峯何突兀遙望出重霄蒼翠如濃墨峻峭似筆描鳳臺並嶢嶢麟河繞迢迢人文蔚滄陬勲業爛中朝

壽東坡 并序

戊午嘉平月十有九日爲蘇長公當年降誕之辰雨民觀察招飲諸英流於珊瑚研齋設東坡遺像陳酒煖香以爲之壽并囑來賓各賦詩章以作紀念自慙瓦缶庸聲曷敢與黃鐘爭響惟懼金谷酒數之罰勉奏下里巴人之曲搜索枯腸用資塞責

我讀坡公文汪洋如大海我誦坡公詩綺麗如翦綵我閱坡公書几案生光采我欽坡公節

坎坷不爲改惜居千載下莫由睹容儀忽於使君齋觀仰古鬚眉燕香且薦醴瞻拜何依依  
云爲坡公壽紀念當賦詩使君真雅人特舉此韻事公餘集羣英筆墨作遊戲陋技媿雕蟲  
豈敢輕嘗試效顰作東施重違使君意卓哉眉山公歸海文益工窮愁不廢學積健斯爲雄  
使君詞華炳居然類雅風文章堪壽世將毋媿文忠

己未仲夏寓金城夢謙弟

花萼遭風雨悽愴逾廿年吹篳音久寂無計啓黃泉今夕復何夕天公假我緣客中逢子季  
言笑若生前問渠共誰來豈不畏炎夏答言匹馬來獨行殊瀟灑予懷忽思歸欲跨乏鞍馬  
弟言兄乘駒願隨鞭鐙下語樸情彌摯怡怡共一堂鄰雞何無賴驚離黑甜鄉頓使幽明隔  
鵠原竟渺茫談言猶在耳想像斷人腸

恭祝俊卿劉太老先生八旬晉六大慶

保導河議員劉應鳳子翔之大父

森森松十丈翠蓋聳穹蒼凡卉爭欣羨身如百鍊鋼豈知年少日飽閱幾風霜於鍊俊卿翁  
髻齡卽異常推梨同文舉溫席類黃香孝友根天性聲名早溢揚忽逢蒼狗運徧地起機槍  
號泣投深井負親冒刃行彼蒼憐孝子弭亂左文襄圖籍收蕭相殊榮總六房間關探虎穴

手足免參商禮孝爭肥瘠同流百代芳施丸療疾痰掩骼著慈祥里社千工竣經營萬苦嘗  
花門重啓疊勞績炳城防父老談前事茶餘酒後詳高年登耄耋耳目尙聰強珠履來千里  
瓊枝繞一堂承歡爭舞綵介壽共稱觥春酒羊羔意臨歧貢詩章

冬至有序

己未仲冬珊瑚研齋主人招集騷壇諸君爲消寒第一集是日適逢長至日卽以冬  
至命題主客都計十人爰以壁間聯語日始雲中出峯從天外來十字爲韻余掣籤  
得始字

天運本循環萬古周復始陰伏陽自升造化固如是當夫斗建亥天地遭塞否雪寒風凜冽  
萬物皆披靡無何日北行一陽從地起飛灰動管中弱綫添宮裏貞下復起元事事漸可喜  
天行固有常世運亦若此否極泰當來亂極世復理上下五千年往事垂青史中華建新元  
綱紀抑何弛兄弟嗟閱牆南北嗤鼎峙萬里皆萑苻四郊多壁壘甲冑生蟻蝨干戈尙未已  
陰霾彌神州氣象寒冬似嗟我黃冑區豈無愛國士和衷共圖存人心當不死卽此是陽生  
中原庶有豸清夜告蒼天焚香會長跪泰階何時平予將拭目俟

題狄道張兌谿先生祠堂

乾坤有正氣磅礴宇宙間每逢陽九世節義炳人寰明祚傳嘉靖國運日銜山當時秉鈞者  
千秋一巨姦竊權作威福顛倒馬與鹿縉紳趨附遲往往遭竄逐是以勢熏天百僚咸畏縮  
朝政雖日非緘默避誅戮卓哉豪傑流與國同戚休藐躬苟利國禍福不遑謀嶽麓張兌谿  
葵心傾冕旒鷹鷂懷壯志嫉惡如寇讎河間彈嚴黨汚吏投刑網建醮劾元臣舉朝服忠讜  
廷杖碧血飛錚錚仍強項草疏救椒山俠腸可想像權奸忌時名守廬俾遠行作郡五閱月  
隆隆著英聲一朝罷官去歸裝襤被輕家山辭九薦詩酒養餘生嗟嗟我隴右雙忠騰萬口  
蘭谷與兌谿聲名高泰斗祠宇建洮陽二公同不朽秉筆揚清芬愧非燕許手

雨中懷遊子有序

蔚兒由上海賦歸遲遲久不至令人悶損加以秋雨連綿倍增韞結因賦詩遣懷時

在蘭垣

得書悉歸期朝朝盼兒歸道里雖云遠歸來何忒遲跋涉憐兒苦烽煙慮兒危時陝道不靖況兼  
登道後秋雨日淒淒泥澀轂難轉路險馬難馳淒涼茅店裏累夜聽鳴雞雞聲雜雨聲因風

透疏楹窗頭整行李欲行不得行腸料千迴轉風愁兩袖清恨無縮地法瞬息到金城片念  
馳千里孤燈對五更登雲如有術引睇望行旌

金城馬路

金城憶往昔通衢鋪以石舉足盡康莊往來何安適無端毀石街偏將馬路闢天雨遇淋漓  
泥淖深三尺馬行每旋濘人行恆沒屐沿途泥亂飛濺衣并點額可憐闌闌間連旬塗炭積  
城市斷交通何如處鄉鄙

輓王任之

王諱天柱字任之隴西人奉甘肅省長委派考察歐美教育因勤勞致疾民國九年  
卒於倫敦

嗚呼王任之論理當不死甘賈正英年夫何遽至此憶昔遇金城年甫成童耳丰姿潘岳同  
穎悟鄴仙似同時輩流中共詡奇男子桂萼幾何年巍科拾青紫學品重儒林儼然名下士  
當軸采英聲曹掾應重委興學費經營人文期蔚起宣力近十年壯心殊未已翩然涉重洋  
遨遊歐與美學海藝林間奔馳徧玉趾矢志擷精華歸餉我桑梓何圖正宣勤暨入膏肓裏

噩耗傳倫敦聞者皆殞涕遺呈讀淋漓聲淚如滿紙淒絕衰邁親倚門望旋里傷哉糟糠妻  
歸程暗屈指問關輿槩來始知長已矣咫尺邈山河號咷不能止吁嗟古今才每遭蒼蒼忌  
英雄不假年徒抱擎霄志今我祝英靈化鶴家山至願仗來生身續了今生事

輓從弟忠和

地震方驚心噩耗又到耳嗟哉韶華年一疾竟不起憶君在生時戚鄙重行止丹桂五枝中  
長厚端推爾人逸我獨勞動不少弛人華我獨樸愛著舊衣履恂恂懼忤人斷斷無他技  
容貌常溫和詞氣遠倍鄙行年三十餘不知怒與訾醇良如君者吾見亦罕矣天道何茫茫  
俾爾頓早死上棄白髮親下遺冲齡子回憶鶴原情潛焉爲隕涕揮毫對寒燈淒慘深宵裏

種柳二首

宅邊新闢園隙地多栽柳閒坐綠陰中獨酌消煩酒  
我愛鶯聲好笙簧舌鬪成環池多植柳端爲待鳴鶯

種花二首

娛目愛花豔飲酒愛花香及時關花塢種花不辭忙



健體要習勞習勞應起早種得滿園花早起將囊抱

種竹二首

大火貞朱光炎威不可禦手植竹千竿消卻人間暑  
我欽竹有節我愛竹虛心偷閒多種竹夾徑布青陰

種瓜二首

半世飄蓬跡純鱸每思家不如歸故里學種邵平瓜  
功者名之基德者福之醇種瓜而得瓜卽此是明效

種菜二首

古來肉食者方寸每懷憂何如心無憂園蔬愈珍羞  
種得連畦菜隨時佐我餐咬根如可碎斂恥向人彈

種蘭二首

種蘭趁三春開花當夏日移盆置書齋清香溢滿室  
蘭苞吐清馥償我栽培勤能動自有功收穫由耕耘

莫春之初過拉雞山二首

翡翠鋪萬山乍湧一峯雪策馬瓊瑤間人境兩清絕

山北寒凝冰山南暖化雪崎嶇下山阿回頭歎陡絕

友人約飲河陰梨花館

開筵梨花林儼入香雪海花香沁金樽朱染頰與頰頰映梨花紅白相耀彩醉眠藉花茵  
耳靜聞款乃

關貧富關係地理之謬

民勤則不匱名言貽左氏頽惰家難成懿訓垂朱子吁嗟今之人此理等閒視迷信地師言  
誤人兼誤己憶我到河陰接洽邦人士或席厚履豐富與猗頓比或茹苦含辛貧與原憲似  
富者稽鄉關強半客籍是貧者溯淵源強半土著是客富而主貧則云關地理北山是主山  
濯濯童阜耳南山爲客山蒼蒼勢聳峙低昂旣不同潤燥殊若此所以主客間貧富懸乃爾  
此說千人同我則云誤矣勤者富之基惰者貧之始貧富本靡常惰勤考素履富者苟怠荒  
家運從此否貧者果自強榮華可翹企其道在人爲地理安足恃堪輿殊荒唐毋信斯爲美

望雲

少陵狀雲形白衣與蒼狗今我望浮雲恰如雪山走有時類熊羆蹲踞欲哮吼變幻在須臾  
靜觀擎杯酒

阿什貢道中

插天轟丹厓夾道森紅柳風聲喧滿谷殷殷如雷吼天寒體欲僵瑟縮袖我手茅店息征驂  
消寒頻酌斗

附錄朱遠峯和章壬戌夏正十月

夜亦長如年起眠恰似柳余平日不用燈即眠故夜半即起起而復眠者至再剪燭披衣坐待旦聽鯨吼肩聳賦

詩難撥灰爐烘手早飲成我癖朝朝酌以斗

追悼褒揚貞孝江蘇武進女子職業學校校長李靜珊女士二十二韻

國初鄧貞女巾幗勝鬚眉東海傳懿行大城樹豐碑鄧貞女直隸大城縣人因侍奉孀母終身不字素嫻各種科學畫繡工尤擅精

美歷充京津間各女學校教習民國三年病故曾蒙中央褒揚徐東海為之作傳遺徽存國史繼蹤更有誰不圖江淮間復出李靜

河彼此揚洪波靜珊更可佳儼然實業家天荒創職校生計謀裙釵宣勤十餘載勳業爛如花巨災逢水旱憂席不暇煖鼎力糾同人游藝博鉅款贖路籌儲金勸募不稍緩大局動關懷求諸閩閩罕仇貨主和平見解獨精明發明替代品奇謀勝戰爭吁嗟李校長允宜膺褒獎方期享大年事業日增廣精神瘁憂勞音容歸想像哲人雖云亡大名垂天壤蕪詞寄郵筒聊用誌欽仰

民國九年移杏一株於東園至十二年始開花一兩枝戲賦此章

栽培經四載始綻一枝花舉杯向花問緣何遲吐華嫣然花致詞早花亦奚爲器以晚成貴道以閨章宜但使結果佳何嫌開花遲

病後言懷十二首

臥病六閱月幾作泉下人今幸占無藥儼然再造身多少牢騷感今朝一掃空人生行樂耳寧復計窮通拘滯根天性常如涸轍魚工愁斯善病今是知非初善病體支離勢若風中燭景欲延桑榆常須懷止足詩書悅我心閒來手一卷興闌卽拋書花間別苔蘚酒無聖與賢銜杯憂者喜芳醴對名花樂事無逾此言志賴詩章陶寫情與性佳日值春秋乘興當高詠

學書最益人微特用途廣臨池向明窗神凝心不放暮年諸事懶惟愛灌園勤欲令花如錦  
供養我心君圖書羅精舍壺觴集雅人花朝與月夕談笑率天真膝前小兒女喃喃愛讀書  
藉此慰晚景風雨課蓬廬

追悼王鶴雲公子鶴雲係王端民廳長第三子

圓顛方趾輩自古皆有死脩短雖不同其死則一耳惟是死雖一隱顯迥不同或等草木卒  
寂寥山邱中或並泰山重身後名益隆但令死得所聲望垂無窮嶽嶽鶴雲君矯矯稱白眉  
髻齡卽率教言動悉協宜侍親來隴右穎悟驚天授課文入耳通感時流涕久隨任承親歡  
庭訓錄以手錢穀及刑名經紀稱人口瓜代委交盤幹才詡寅友趨庭至豐州器識重上游  
愛才爭羅致臂助垂青眸政界名大噪前程期遠到二豎擾重闌忽得家山報匆匆整行裝  
奉命赴瀟湘爲探龍鍾疾恨不傅翼翔行旌抵洞庭露白蒹葭蒼登舟時夜半風浪湧汪洋  
駛至道人磯惡劇演中央哀哉三百人魚腹葬其身至性若鶴雲同時作波臣我聞天輔德  
又聞天福善炎火焚崑岡玉石竟無辨天道太茫茫善者何由勉惟君子爲善初不計禍福  
性分所當爲斧鉞不避戮職分所應盡鼎鑊甘如肉此身可粉碎此心求無惡鶴雲策歸騎

端爲順親志慘劫罹中途莫之致而至天理雖難憑撫心實無媿鶴雲不求名德成名自遂  
盛典荷褒揚令名貽後嗣衡嶽峻極天湘水清且漣鶴雲名不朽江山同縣延

詠除蟲菊有序

園中除蟲菊燕產也茂於夏秋之間瞥視之其莖葉類菽其色類碧玉其花類粉蝶  
狀甚別致爲滄中所創見秋深收採製爲粉足以殺蟲故以除蟲菊稱於世云

蓓蕾當三秋羣菊迴不猶恰如素蝴蝶紛集衆枝頭白環碧居中渲染一何工因時製藥粉  
力能殺諸蟲

惜菊感詠有序

余素抱沈疴至甲子秋月疾增劇然猶列盆菊於庭前日徘徊其中擷旁枝而摘駢  
苞時花尙未開也或曰君病危如此何自苦耶蓋視余病體支離朝不保夕頗有不  
及賞花之慮余感其言賦此自遣

余愛傲霜姿力疾勤護持豈必冀東籬蓓蕾花滿枝昔賢疾革時易簣尙孜孜臨危志不移  
可爲百世師況余病雖危瞬屆重陽期將舉黃花卮將賦黃花詩韻事近在茲不樂復何爲

此先君八月下旬作也九月中旬盆菊逐漸開放蔚列盆中庭紅黃交錯先君扶杖於廊下笑謂蔚曰本年菊花新增數種余因疾未能及時灌溉慮其花遲而余不及見今幸含苞已吐爾尤排列得法更覺濃淡適宜古人云好花看到半開時藉此頗足娛目自茲以後先君爲二豎子所困病益增劇不復賞花握管矣此詩竟成絕筆每閱詩稿至此輒掩卷不忍卒讀嗚呼痛矣男成蔚謹誌甲子年十月末

### 七言古詩

遊元朔山 山在西寧道屬大通縣境

擾擾風塵數十年無緣遊賞好林泉一朝撥冗浩然去喜共同人訪洞天行行策馬新城道遙見靈山矗碧昊泄霧噴雲象萬千雄奇恍遇蓬萊島過橋甫到後山隈大雨傾盆逐遠雷林樹森蒼夾古道天公洗淨舊塵埃須臾雨霽雲煙斂山鳥間關花爛漫驅馬穿林陟崔嵬紆徐引我登霄漢絕頂憑臨眼界空羣山羅列似兒童村煙隴樹鋪平地北塔南禪入望中風鼓山巒雲亂走河流石硤聲聲吼縱橫畎畝碧兼黃新城古城大如斗霞擁山凹古洞深簷牙高喙出叢林挽蘿乘磴徧搜覽花草芬芳起道心游罷登高復遠眺臨風偶效孫登嘯

磨崖別薛欲題詩住筆恐爲識者笑

和張烟堂清明次日陪同人南禪小飲步原韻

浮名羈絆十年久慨慕南禪徒搔首去年走書達湟中暢飲預邀三五友萍蹤今幸到家鄉  
正際春光縈綠柳節過清明風日和同人約飲踏青酒出城汗漫上南禪環坐皆係知心偶  
山色河聲共一樓胸襟對此曠怡否道士催歸擊暮鐘流連晚景遲遲走殷勤還贈臨行言  
登高更約重陽九

虎臺懷古

臺距遼郡西門外五里相傳南涼王禿髮烏儂所築

西平郡西矗層臺臺勢嵯峨出塵埃築臺偉人今何在只今惟有臺崔嵬憶昔南涼圖霸時  
仗鉞登臺曾誓師飛揚大纛接雲漢鼙鼓聲中畫角吹鮮卑畏威來獻馬青海部落拜臺下  
兵衛森列顧盼雄觀者如山語嘔啞英雄事業石火電光阿房銅雀同慨荒涼走馬西來訪  
遺蹟感時撫事增惋惜君不見虎臺突兀風雨中滿目蕭條蓬蒿碧

喜雪行有序

東坡作喜雨亭記因雨之及其時也雪能及時可喜正與雨等戊午除夕大雪達旦



久旱得此喜可知也因賦喜雪行

入冬久不雪多燥嗟少寒豈無六出飄終覺苦嘆乾聞說冬雪卜春雨冬乾無望春霖普田不潤澤苗難豐螟螣蝥賊且肆侮況復陰陽欠調和閭閻從來多痒痾君不見去冬隴上疫癘徧端因天旱實無佗蒼蒼施仁愛白晝漫天雲忽晦料峭繼朔風吹送祥霰來遠塞萬戶正當伏臘宵紛紛玉屑糝青霄曉來忽現光明世山河大地布瓊瑤連珠爆竹聲聲起農忭鄉村商忭市瑞兆豐年疫氣消病者以愈憂者喜相逢少長盡歡顏和氣祥風徧九寰我本工愁善病者也將牢騷尤怨一齊刪

贈享堂李滋亭并引

民國八年己未礪伯老鴉礪路徑爲雨水沖斷行旅裹足以工程甚鉅無敢議修築者至今年滋亭乃慨然獨任其難籌款興工凡五六閱月始行告竣計需僱工三千數百人需麥豆十餘石支大錢三千數百緡其勇於爲義如此鄉里擬請褒獎辭之是又難能而可貴者也爰贈長歌用誌感佩

富翁多作守財虜濟物利人不數覩豈知薄德厚貲財子孫揮金每如土聲色狗馬詡豪華

不念先人儲蓄苦富等猗頓轉眼空慳吝人嗤祖若父何如善用孔方兄廣作公益貽令名  
積善定食餘慶報挺生蘭桂振家聲我持此意期世人五十年來如鳳麟不圖今日過碾邑  
得諸享堂李滋亭寧蘭險道數鴉硤中有巨流兩山夾鳥道排空石嶙峋經此人困馬力乏  
忽逢霖雨降連絲山水奔騰如巨川峯巒崩摧羊腸斷行人咨嗟徒仰天上有萬仞之巉巖  
下有不測之深淵鴉硤迢迢四十里空中惟有鳥盤旋滋亭家本號素封仗義疏財著閭中  
行旅艱難渠心惻力肩鉅任迺鳩工糜錢數千貫裹糧數十鍾多少壯丁運巨石填溝塞澗  
聲礮礮經營半載工程竣然後熙來攘往路方通憶我去年赴蘭州取道鴉硤路成溝旅客  
跋山覓徑走挽蘿攀藤如猿猴羸夫冒險涉河流驅羸渡水類浮鷗健兒脛折馬蹶脫亂石  
縱橫如臥牛今年策馬此重遊險夷今昔迥不侔去歲危途今坦途千人歡感萬人謳里黨  
曾向滋亭揖謂君功成名亦立共願據情請褒揚將使義聲仁聞播城邑滋亭聞之不爲然  
吐詞落落何坦率謂我初心非求名求名轉使本心失不忍人愁行路難化險爲夷吾事畢  
滋亭磊落晚近稀要譽鄉黨恥陋習功成不居殊欤然嗟哉滋亭弗可及

秋夜觀書燈下有感

暑退夜方長青燈吐光芒燈前手一卷寄興聊徜徉不圖老眼對青燈朦朧如隔紙一層字  
慮微茫行慮密讀書煞費兩眸凝凝眸稍久目力倦閉目聊揮輕羅扇自笑衰年猶書癡徒  
令頭目昏且眩憶昔幼學向螢窗雞鳴風雨對寒缸眠蠶細字入吾眼千行萬行視不曉英  
年豪氣狎牛斗自忖年華遠白叟豈知日月如彈丸黑頭颯忽成皓首吁嗟乎人生苦乏卻  
老術萬牛難挽少年日獨對青燈意黯然四壁蟲聲助太息

地震

共和九載月嘉平日臨十六時初更忽然樓動屋搖蕩如泛波濤巨艦輕丁男子女奪門走  
臥榻嬌兒泣嗶嗶廿分鐘後始寧靜方息千家鼎沸聲夜分復聞地球震四壁鏗錚金鐵鳴  
拂曙廬室又匍匐一夕令人數次驚誰知次日天剛午雷聲殷殷動窗楹昕夕之間四次震  
坤元似鳴其不平我聞地球亦行星自轉公轉旋太清有時火噴或陷落地球被震聲轟轟  
更有斷層殊可怖城郭覆沒山岳傾既不若日月之薄蝕可推測而預明又不若鬼魔之作  
崇可祈禳以精誠可憐國人遇地震齋僧佞佛何營營多少素稱慈善者誤信禦災賑貧氓  
貧氓雖感解推惠徒惹人嗤太愁生何如揮金作事業造福蒼黎博大名地球不墜名不墜

卓哉志願何恢宏

河陰多風旅次感懷柏梁體

連日陰風慨怒號空中洶湧似波濤天公何故發牢騷搔首問天恨天高此時飄零李與桃  
漫天楊花如亂毛卓哉松柏挺不撓亭亭依舊干雲霄回憶陽和春暖朝千紅萬紫鬪嬌嬌  
烈風捲地羣芳銷改柯易葉頓無聊始知天公假風潮特顯松柏節可褒不媿爲草木中賢  
豪

陽月北度拉雞嶺

險絕拉雞嶺頭路逢冬此嶺更難度羊腸紆折繞巉巖彌漫凍雲與寒霧積雪凝冰冰滿坡  
坡陡冰滑艱於步羸馬前仆驢後僵咫尺危崖殊可怖血污寒冰處處紅撞裂驢脣與馬胯  
今我北歸遇嚴冬藐躬况復蒙疾痼雪花紛撲人馬白風頭如刀聲如怒滕六巽二互逞威  
自歎微軀等孤注上山喘如竹筒吹下山傾跌遭屢屢顛危扶掖賴紀綱投宿荒村向昏暮  
君不見衰年病軀歷客途客途往往遭物故我逢此境幸生還默向蒼蒼感呵護

附錄朱遠峯和章

我今崎嶇遭世路年華似水歎虛度惆悵搔首仰青天  
誰復撥雲霧利權義務辨  
微茫從此艱難詠天步優勝劣敗真天演干戈同室令人怖  
我今猶抱杞人憂支那貧  
弱成疾痼吁嗟乎水旱災疫已頻仍蚩蚩何辜干天怒  
樂土哀鴻今猶見幸有西江水  
挹注秋成式食兼式飲滿浮大白舞屢屢倒酒旣盡呼典裘  
短褐不妨卒歲暮君不見  
閉戶高士且長吟朝朝暮暮慣溫故賜我詩章何清新  
覓得碧紗快籠護

五月十三日遊香水園卽景

攜孩汗漫出北城芳郊彌望柳青青是日南禪鬧如市  
車馬喧闐數里聲此間獨具幽閑趣  
綠陰深處鳥嚶嚶行行直上八德菴中有人兮靜若僧  
手引壺觴憑檻酌山色河聲任視聽  
見我登樓喜動色把袂入座酒同傾興酣欲傍林泉宿  
孺子無知促我行歸途芳草斜陽裏  
流水潺湲如玉鳴

癸亥中秋翫月有感

半生蹤跡似飛鴻飄然淩風西復東身爲飢驅違井里  
八度翫月在客中每值中秋月如晝  
玉樣乾坤萬里同此際卻念小兒女情長氣每短英雄  
風清月朗家山遠恨無翎翅騰蒼穹

瓜果侑觴強笑語聊憑知己慰離悵今歲萍蹤在梓里骨肉團聚樂融融惟惜冰鑑潛雲裏  
夜色似漆雨濛濛未能免俗羅酒果舉杯惆悵對長空吁嗟乎人生每苦不如意事願恆左  
慨何窮不若於失意之中求適意且將牢騷尤怨付秋風

余杜門養疴久矣因病軀不能出門愴然賦此

一病三年暗自傷如柴瘦骨久支牀去年勉強猶登高今年登高難勉強敲門靜似僧入定  
可憐辜負此重陽我思同人遇良辰觴詠流連忘主賓黃花筵前憶舊雨也應念著病榻人  
吁嗟乎一年容易值重九轉瞬又飲黃花酒人生行樂須及時那管世局變蒼狗但恐二豎  
子不肯辭我走安得扁盧起沈疴使我明年今日得與朋儕同聚首

時先君骨瘦如柴坐臥維艱而腹漲似盆又不能勉强起坐故有敲門靜似僧入定之  
句極無聊賴作詩自遣然沈疴難起果不出自己所料明年菊酒素願莫償悲夫讀至  
此不覺濟然淚下遂和淚濡墨以誌痛時甲子冬月朔日也男成蔚謹識

附錄基香齋和章

故人抱病我心傷漸入沈疴竟臥牀鎮日藥爐長作伴夢魂猶自盼康強一病不覺秋

色暮滿城風雨近重陽重陽自古是良辰賞菊登高約嘉賓因疾未預茱萸會羨煞龍  
山落帽人猶憶前年消寒逢九九東園開宴會詩酒一時作者盡探驪我作終慚虎類  
狗君詩一出壓元白連日唱和筆競走吁嗟乎曾幾何時君登仙愛而不見空搔首

### 五言律詩

春日登金城北塔山文昌閣

披襟登峻閣倚檻俯長河夾岸人煙密浮梁車馬多桃開紅爛漫柳漾碧婆娑惆悵家鄉遠  
春光果若何

閱米襄陽草書帖

一藝傳千古高山未易躋右軍肩可比懷素首應低媽雅含剛健雄渾寓整齊況兼精繪事  
煙樹至今稀

豐州雜詠

綏遠即古豐州  
萬人寇掠郡縣以後  
至爲巢穴

豐西多寇盜急報羽書通亂度陰山馬陰山在綏遠城北二十里俗稱大青山哀鳴塞上鴻兵戎杯酒外民命  
手談中絲竹常攜妓風流安石同

其二

此地宜耕牧當年重墾田富民惟教稼防國在開邊難讓將軍美應思太守賢胡天留政績  
禾黍賞連阡

其三

賊氛重捲土飲馬渡黃河悍將爭降敵驕兵且倒戈世真頗牧少人竟虎狼多莫解孤城困  
民生其奈何

其四

窮邊嗟弛禁致富亦多材薪米連年貴罌花徧地栽一廳財用匱八縣利源開惟恃君門遠  
爭誇聚斂才

其五時官軍有滋鬧娼寮事

又教吳宮戰雄風昨夜聞佳人齊破膽猛士盡揮斤未斬樓蘭將先摧娘子軍歸來應受賞  
報捷好書勳

其六



國匱生機蹙官邪意氣高有財皆爾祿無俸不民膏寸縷終年著千金一擲豪廣筵長席上曾否聽飢號

其七

皖人桂某時爲綬遠嬰務總局科員因出差陷匪中

同人遭虎口聞息陡心驚不解工趨避殊難問死生一官成俘虜三築失降城荆棘干戈裏傷哉朔漠行

其八

萬法邊民苦頻年政未修妻孥餘喪亂菸酒尙誅求不是叢官謗緣何結寇讎嗟無寬大治賊盜有同憂

沙溝

在平番縣界前清咸豐中陝甘總督沈文肅公爲暴水深沒卽在於此

沙溝分大小客路貫西東夾道雙厓立郵程一線通昂頭天五尺舉足地三弓身逐波濤去愴然緬沈公

冬日閉會旋里由平戎驛早行

旅夢方酣枕征夫已駕車風迎人面翦霜落馬毛華天曙驂鳴郭晨炊客抵家貌躬慚代議

勞頓敢咨嗟

滄中雜詠

婚嫁爭奩聘神州見虜風張筵同顯宦授室甫成童閭巷頭垂辮裙釵足似弓何年將俗易  
怪狀少滄中

其二

籌款因興學奸民妙計生藉端徵廢債斂怨徧羣氓巧假官紳力時聞鼠雀爭但愁閭里衆  
仇視我庠饗

其三

採買何年始蒼黎近代窮營糧千厥裕廩粟四鄉空近年營額增加採買糧石之多逾於正  
空九忍覩飛芻苦誰知射利工每至九月間兵役下鄉追呼急如風火泊鄉民運草至城  
藉往往有納賄始克入場折價暗歸中飽情軍門深萬里難得此言通事至權衡之太不公平尤為鄉民所怨讟

其四

鼎革成民國喁喁望太平誰知蒼赤輩都是怨誹聲逐鹿風雲擾民國肇興革命三次登龍  
南北對峙累年干戈

稅斂橫民國新增皮毛菸酒散茶鹽 桃源雖暫住廈燕感偷生

其五

青海銷烽燧清平近百年 氈裘安畜牧琛寶貢幽燕東粵方增竈廣東自民國五年建設軍政府迄今四載尙與北軍

對西鄰竟覬邊英人主張西藏獨立劃分青海疆域之 鼾聲來臥榻黃胄尙安眠

其六

親民惟邑宰理訟坐琴堂突爾來神甫無端作主張天主堂廉神甫每干涉詞訟偏袒教民奸民之健訟者皆相率入教倚爲護符

違心翻阜白信口任雌黃安怪蚩蚩者紛然入教忙

壬戌新年金城紀事

國旗飄五色新歷賀二元徧市鷄軍鬧沿街雀訟繁點金無妙術易鈔有煩言欲覓銅山地

鑄錢塞亂源

是年金融奇絀鈔票不能兌現年關伊邇闌間皆喧嚷聲是從來未有之現狀也

酬余永年明府將赴循化留別詩社諸公步原韻

鳧鳥高鶩日風光豔海棠雪鴻良友感竹馬部童忙行政兼寬猛維新戒飾妝循聲宣百里

騰達望飛黃

七言律詩

癸卯春初肄業五峯首夏還鄉途中口占

水滿溝渠綠滿田依依楊柳籠朝煙  
鮮花燦爛開遙圃嬌鳥間關語匝天  
鸞序潛心稽往古山川轉眼異從前  
自慙歲月如梭擲吳下阿蒙似昔年

仲夏游蘭山紅泥溝時肄業蘭山書院

炎景麗天金欲流課餘選勝到名溝  
巖厓峭處飛丹閣榆柳陰中露畫樓  
窗外泉聲喧滿耳林間鳥語碎當頭  
銜杯享受清涼福半日神仙幾世修

武定關在西寧小石硤

雙厓峭立鄯州東關鎖邊防氣象雄  
崒崔豈殊函谷險巍峨直與玉門同  
黃河波湧鼉梁駕青海鋒銷鳥道通  
多少羌戎曾入貢備虞不復挽雕弓

秋夜感懷

光緒乙未花門之變寄寓  
郡城秋夜無聊愴然作此

風清月白太淒涼  
刁斗聲中苦夜長  
鴻雁離羣啼遠塞  
鴛鴦失偶唳寒塘  
萱幃空憶丸熊日

梓里偏成戰馬場，慘絕哭聲千萬戶。茫茫百感斷人腸。

張良椎夏同甫宗師課士采蘭精舍題二首

中原久已屬強秦，誓不帝秦大有人。嘯虎英風椎在手，祖龍當日魄褫身。復讎豈必荆卿劍，破產寧思張翰尊。敝屣封侯甘避穀，赤心終始爲韓臣。

蘇武節

氣概崢嶸洪皓先，愈經磨折愈勍堅。捧書馳驛三千里，持節牧羊十九年。俠骨何曾銷雪窖，貞心畢竟抱冰天。男兒不朽惟忠義，麟閣芳名萬古傳。

王祥躍鯉

珊瑚研齋第四集籤分  
四題時民國七年冬月

不有王祥孝思真，承歡膝下總無因。委身弗恤堅冰冷，慈口方嘗尺鯉新。張達居廬狼竟避，重華耕歷象偏馴。至誠格物非虛語，并作倫常不朽人。

楚莊挾纊

雪地冰天凍欲僵，貔貅整隊出瀟湘。恨無繪纊資軍士，幸有忠言進楚莊。溫諭風和宣衆壘，歡聲雷動賦同裳。霸王自有驩虞術，無怪當年兵氣揚。

黃棉襖

隆冬陡愛倚欄干正際嚴寒不覺寒紅日生溫同襖袴黃棉引喻勝湯盤加身奚讓黑裘煖  
曝背渾忘白袷單除卻人間恇怯意千門萬戶共騰歡

湯谷

燦爛瀛洲如火光煙波深處湧朝陽兩山環繞形成谷一水澌涸煖若湯聞道羲和賓出日  
料知安羨浴中央迄今東望帆檣集竟變繁華富麗場

附錄黎兩民觀察和章原韻

王祥躍鯉

臨深履薄本天真驚絮奇蜂有夙因入幕雀曾供給巧躍冰鯉更見聞新熊和未抵兒  
衷苦龍化終看母性馴亦有雙魚出詩里姜詩躍鯉係事母難能端合讓斯人

楚莊挾纊

旂鼓風雷凍不僵軍聲當日震淮湘春秋時蕭地即今徐州蕭縣向係淮水流城一言蕭社終淪楚五伯兵  
威合數莊忠信由來踰甲冑會盟誰復繼衣裳五伯惟齊桓有衣裳矣千秋爭衆惟行惠

不待交綬武已揚

黃棉襖

萬象回春好學干禮言春夏況逢晴日卻新寒煖傳斯舉歌棉襖何斯舉有喻類眉山

引燭盤東坡日喻有扣盤捫燭之說烏赤射欣留后羿淮南子堯時十日并出羿射其九鳥皆死墜羽翼狐黃解不待田單

何緣更得虞公劍淮南子虞公與夏公戰日欲落公以劍指日日遂不落一指還騰億兆歡

湯谷

聞道滇池燦佛光雲南有放光何如滄海爛晨陽千秋幾換陵成谷百沸疑探火熱湯

赴壑徒驚波滾滾遷喬誰見旆央央紫山尙有高溫地盛弘之荊州記南陽郡城北有紫山東有一水冬夏常溫因名

湯谷未許嶠夷獨擅場

附錄胡瑞蘋和消寒第四集詩四章胡印燮坤

王祥躍鯉

臥冰泣鯉出天真孝水名傳亦有因哭筭敢云兒盡道拜柑原爲母嘗新禹門不化龍

身去庾宅休誇鶴性馴黃雀更堪供膳養飛來成就此完人

楚莊挾纊

寒重如山凍欲僵  
霜矛雪甲起淮湘  
民歌無褐淒蕭社  
士賦同袍戴楚莊  
心鐵鍊兵逾介  
胄陣雲出岫  
想衣裳祖風未用嗟  
藍縷煖語溫人軍氣揚

黃棉襖

駒影輪行十二干  
煖同挾纊解嚴寒  
地消雪帶明金鏡  
天脫雲衣露玉盤  
解笑田裘猶未徧  
溫披趙日覺嫌單  
風梭雨翦齊收去  
製就同袍萬國歡

湯谷

石鼎烹雲放異光  
無形爐炭秉陰陽  
煖龍何止溫堪浴  
淪卵長看沸若湯  
天日如賓來旦氣  
地星有火盪中央  
兩言未信誰爲是  
文筆千年作戰場

附錄屈雋卿和章原韻

王祥躍鯉

及魚誠信本天真  
鯉躍冰開固有因  
敢謂絮嫌雙袖冷  
渾如笋茁一枝新  
臨淵卻喜游鱗上  
入幙還看衆雀馴  
魚膾有詩歌孝友  
合將張仲美斯人



楚莊挾纊

敵膽寒來走且僵  
吾軍猶自震荆湘  
偃旗威挫淪蕭社  
挾纊恩多頌楚莊  
溫語拊循歌  
並被熱忱鼓舞協  
同裳煌煌霸業承  
齊晉未許桓文武  
獨揚

黃棉襖

不計溫生度若干  
黃棉被處可消寒  
中央色映如披襖  
上界光浮漫扣盤  
向日卻添紅  
線煖臨風肯怯翠  
衣單加身儵作同  
袍賦一曲高歌許  
共歡前人有黃棉  
襖歌

湯谷

一片山光接水光  
樽桑日出映初陽  
瞳湧出疑暘谷滾  
滾蒸時比沸湯  
蘭浴身輕臨  
上界黍生氣煖透  
中央咸池影落誰  
臨眺輪與天仙獨  
擅場

和屈雋卿消寒第四集詩四章元韻屈印耀

越王抱冰

片念惟期雪國恥  
三冬不憚抱寒冰  
廿年大事勤生聚  
半世陰謀出戰兢  
懷烈時懷嘗矢辱  
精神端爲沼吳凝  
膽薪同促勳名就  
佳語千秋并豔稱

襄陽尋梅

最饒興趣是襄陽曠代詩人清且狂策蹇獨行三尺雪尋梅時折幾枝芳衝寒摘豔應皴手  
至老迷花具別腸頻喚奚童多採擷歸來贏得滿庭香

還邱蠶繭具蟠山亦名還邱東有雲石廣五百里產異蠶長七寸有鱗角以霜雪覆之作繭長一尺絲有五采製錦服之入水不濡入火不焦事見述異記

異蠶妙產還邱東五采絲成仗化工織錦懋遷三島面製衣晉尙九仙躬網緼寒雪嚴霜裏  
出入深淵烈火中但願天生盈尺繭作裳徧及九州宮

冰牀

試望冰凝萬頃陂晶瑩似鑑敢飛馳製牀共訝良工巧履險偏如大道夷駒駛從來難比迅  
狐聽何事更懷危丁男子女恣遊戲最是春初臘杪時

附錄屈雋老原唱

攜手試從冰上立登牀還似逐雲馳龜支有力前難卻狐聽無聲險亦夷頭轉不隨波  
上下腹堅遑計路安危鉛山樂府留遺製記否京師作客時冰牀  
何年雲石倚山東尺繭成時製錦工飼養幾經仙女手彰施應被異人躬覆來醞釀冰

霜裏披去優游水火中安得還邱方外種徧移天下浴蠶宮還邱蠶錦

國恥未雪氣先凜廿載艱難一片冰敵膽他年寒慄慄王心此日懍兢兢  
沼吳熱血全腔沸哀越孤懷獨抱凝贏得臥薪無限苦煌煌霸業到今稱越王抱冰

風流吾亦愛襄陽說到梅花興便狂萬里鴻飛餘雪迹一生策蹇爲寒芳  
杖藜我去憐衰鬢倚樹人來話別腸此景偷邀摩詰畫合從王孟祝心香襄陽尋梅

讀史有感時卸事歸綬客居化城

椿菌休分大小年驚天事業等浮煙將軍不過成三箭名士何嘗值一錢  
自古多情惟學佛世間最樂是耕田駒馳歲月須珍惜莫似春蠶苦自纏

感懷

年來百事與心違嘯鳥聲聲勸客歸花木有情時局變河山無恙昔人稀  
幾經患難愁春雨老去英雄戀夕暉前路茫茫天夢夢安排蓑笠釣魚磯

滄中懷古 己未冬至日珊瑚硯齋消寒第一集題

漢武開邊世所譏滄人獨感厥功巍輿圖幸隸中原版民族不淪左衽衣  
令塞築城闌闌密

屯田關地稻梁肥蘭垣萬戶賴漕穀拓境當年敢厚非

嫖姚勇略冠三軍滄陔初開樹大勳梁毗介廉化虜俗壯侯屯墾靖邊氛版圖重復王襄敏  
恩信旁孚鄧使君累代經營功在史弦歌遲至有明聞

溯洄淠水仰前賢仁篤高風郭憲傳橋梓張門濟鳳美珥貂源氏羨蟬聯進良渥荷宸章寵  
國柱常攻大敵堅最愛盧清方雅度田園騎犢甚蕭然

兩間正氣賦裙釵事較柏舟更可嗟抗節青閨心似石完貞素練淚如麻雙鞍言語妙天下  
孤塚歸巍傍路又烈女爭傳賈玉碼綱常名教振荒遐

### 憶庭訓

天姿不厭鶩駘陋家塾特因豚犬開函丈談經忘日疾課文關謬費心裁詩書十里煩遙借  
燈火三更悵坐陪曾問秀才安足用答言官自秀才來  
早歲凌雲屬子虛課兒蓄想壯門閭櫪駒冀駛程千里笨伯期通書五車經史喃喃詢枕畔  
詞章懇懇解茶餘南宮報捷親何在讀到蓼莪淚滿裾

### 送朱錦屏參軍奉使西藏己未仲夏

驪歌一曲悵西征壯志卓犖抱請纓博望乘槎通絕域高命探險出邊城丁年遠仗蘇公節  
甲帳遙瞻漢使旌固我屏藩消反側戎疆從此奏昇平

壯遊萬里氣如虹攜手河梁感不窮驛路當頭淋瘴雨星軺迎面撲炎風山川盡入詩囊裏  
政俗都歸夾袋中臺旌他年旋玉塞西窗話別夜燈紅

代祝李母胥太宜人七秩大慶

香風吹滿桂花天寶婺光芒徧大千萊綵承歡榮此日篝燈課讀憶當年森森繞砌瓊枝秀  
濟濟稱觴玉筍聯更有躋堂女弟子太宜人曾學女高小校教鞭彩雲簇擁活神仙

百折猶留化石身支持危廈煥重新論才久已輕蘇謝有子無慚稱鳳麟歐荻孟機追雅範  
邵瓜幽棗慶良晨鸞箋聊作葡萄酒遙祝含飴鳩杖人

中秋感懷

星移物換太忽忽過眼光陰瞬息中萬樹梨花初綻白一林楓葉條飄紅擁書旅館孤燈伴  
攬鏡霜華兩鬢同瓜果年年三五夜他鄉仰對廣寒宮

附錄基香齋和章

年華似水去忽忽暑往寒來秋又中桂趁月明花自淡樹因霜早葉先紅歲豐誰料穀  
猶貴民困難言胞是同翻羨嫦娥多遠見預知雲擾入蟾宮

旅次聞添丁有序

壬戌歲羈旅河陰得家書報生男晚年弄璋喜與悲俱感而成詠

鵲噪連朝客裏聽家山書至報添丁嬖妮墮地日剛午瓜果前宵月滿庭預祝唐華歌既翕  
自憐椿老遺寧馨雛鷓鴣長大知何日願了向平賴鵲鴿

附錄基香齋和章

弄瓦弄璋命是聽客中消遣藉紅丁鄉書寄到雁橫塞家訓傳來鯉過庭入夢蘭花符  
吉兆當秋桂子有芳馨難兄今已得難弟他日和鳴羨鵲鴿

重陽登貴德縣城感事

城上高瞻似畫圖羈愁旅鬱一時紓黃河明滅隔林走紅葉胭脂滿樹塗十載奔波勞靴版  
半生蹤跡遠粉榆年年客裏菊花酒徒向秋風膾憶鱸

鴻雪軒重壽東坡有序

三年前嘉平月十九日雨民黎公會宴集衆賓互相聯吟以壽東坡於珊瑚研齋壬戌歲值蘇老誕辰又作斯舉於道署鴻雪軒韻事重尋風流可喜是日適逢公子湯餅會賓主酬酢懽洽逾恆勉成七律以作紀念

硯齋憶昔萃琳琅爲壽東坡客滿堂遺像兩番陳酒醴回頭三度閱星霜心雄互點交鋒將

鑑中曾行  
點將酒令

毋戰紛飛駢席觴

是日將兩席聯駢衆賓搏戰甚雄

歡讌兼嘗湯餅味

黎公生子公子甫經三日

醉顏燭影共

輝煌

### 病榻吟

回首生平暗自傷胸襟狹隘醫無方憂虞竟釀百骸疾煩惱徒羸兩鬢霜始信養心憑欲寡須知延算賴身強衰軀業等風中燭花裏偷閑手一觥

### 五言絕句

#### 遊滄中五峯山十首

峭壁摩雲漢滄中第一山林泉花鳥備此境隔塵寰  
路轉峯迴處虹銷雨霽晨馬穿林隙徑鳥瞰樹間人

佛閣懸厓轟陰樹影遮鐘聲天際落餘韻逐飛霞  
紆折羊腸道層層到半山藤蘿如有意絕處任人攀  
入夜松濤爽山窗夢亦清五更初睡覺百鳥弄簧笙  
雨助溪聲壯雲添樹影稠我來當暑月涼爽若新秋  
選勝日當午同人共兩三綠陰談笑處茗酒有餘甘  
醉後乘歡興登高覽五峯峻嶒形不一雲裏似騰龍  
顧盼襟懷暢煙嵐四野中下山尋舊徑繞足晚霞紅  
美景留人住遲遲不忍歸至今魂夢裏遊賞戀晴暉

冬月由金城西歸宿朱家井其地水鹹難飲

晚宿朱家井天寒夢不成圍爐難品茗忍渴待天明

早發朱家井

井西龕家灣小澗池亦有旅館但水味不佳行人非  
不得已不宿此地故由朱家井西行百里始就宿焉

茅店雞聲唱征途馬足輕間關行百里傍晚宿紅城

紅城道中



寒氣凝鬢白飛塵撲面黃卻欣泉可飲烹茗潤詩腸

經平番駐防

距平番城南四里  
土人呼爲滿城

寰海爭興漢中原不戴清斜陽衰草裏猶見滿洲城

望香爐山

在平番城西五里其峯巒雙  
秀宮觀玲瓏望之宛如圖畫

除卻廬山外香爐更有山峯巒霄漢上樓閣畫圖間

新城道中

水抱山環處桑陰柳影中室廬時隱顯吠畝任西東

由黑嘴子西行

一路心身快渾忘道不平

此路有飛石崖  
王扁虎頭崖諸險

地多山水趣人在畫圖行

享堂橋二首

峯嶽雙崖立潺湲一水通彩橋橫跨處麗景畫難工

此地山雄秀誰知水更奇試從橋檻望一片碧琉璃

老鴉硤

硤石多奇狀鸚崖勢更雄仰觀生恐怖威猛似鬚熊

### 七言絕句

和王治堂秋暮感懷 步原韻 時肄業金城師範館

惟有駒光挽最難東流不返似濤瀾韶華轉眼歸何處風雨江城送暮寒  
橫斜雁字繞雲端秋影淒涼不忍看怪底百年容易度從來歲月似彈丸  
雨苦風淒猿嘯哀悟彫楓落眼慵開消愁到底知何術把酒縱談待友來  
蕭蕭落葉點莓苔知己睽違費溯洄屋底儒生真鬱悶願標姓字到雲臺  
遙吟俯唱興殊豪柳汁當年早染袍掃盪邊氛君有志逢時草檄筆如刀

### 附原唱五首

意緒茫茫睡亦難浪沙淘盡日翻瀾何年化作豐城劍秋水飛騰射斗寒  
平沙白草杳無端海氣籠天不忍看惟有蒼鷹空秋影高盤大漠遠彈丸  
搖落園林亦可哀游人倦足徑誰開何時好借東皇力共把鶯花引出來  
秋隨落葉響莓苔倦鳥尋林幾度徊怪底人間無一事大家攜酒上高臺

玉塞秋高氣亦豪防邊人老解征袍英雄獨有風前淚屢向鳴泉拭寶刀

和侯珍若同年罷科寄感詩一章步原韻

封侯豈必掇巍科千古勳名仰信何壯志激昂期報國釣臺休荷子陵蓑

附元唱

煌煌天語罷開科多少同人喚奈何我有一條生活計釣魚江上穩披蓑

和基香齋哭殤女詩四章

兒女成行喜不禁含飴堂上博歡深誰知蕙質遭風萎頓碎先生鞠育心  
陡聞噩耗慨難禁最惜臨危顧戀深遙想慈親相對處難留難捨益酸心  
默憶音容感不禁挑燈獨坐五更深卻欣尙有丈夫子頭角崢嶸可慰心

閨中互勸淚交禁逝者無知悲妄深卜氏喪明吾不取好承色笑慰親心

時香齋老親俱在

附錄元唱

臨別雙眸望不禁女情還比父情深夜長輾轉反思後會得音容愈痛心  
情關父子最難禁飲泣吞聲悲轉深強作達觀仍笑語怕逢親友說傷心

音容一夢淚難禁  
週歲恩情無限深  
寄語知交諸好友  
見余切莫說傷心  
內人垂淚每難禁  
一見內人悲益深  
弄瓦未幾忽打瓦  
縱爲鐵漢也傷心

和基香齋剪髮自吟時同事海東道尹公署

躬逢百度維新時  
辮髮長垂總不宜  
畢竟善人能受諫  
一朝剪去舊青絲

附錄原唱

髮辮長垂民國時  
同人皆笑不相宜  
而今始得并州剪  
除盡八千煩惱絲

客中自遣時需次綏遠

離鄉猶憶菊花黃  
馬跡車塵逐日忙  
弦望頻更歸不得  
夢魂夜夜到家鄉  
當年歸去趁梅黃  
梓里頻年作嫁忙  
自媿寄籬非壯士  
此身不憚客他鄉  
間關聽鼓到邊庭  
夜靜無聊望斗星  
宦海茫茫覓渡處  
冀逢知己眼垂青  
蘇秦金盡淹秦庭  
旅館淒涼一客星  
事到萬難翻自壯  
歌吟正氣夜燈青

基香齋和章

去年別君菊正黃  
年來依舊爲人忙  
天涯海角難相見  
幸有新詩到故鄉

詩箋奉到杏初黃君自清閒我自忙近日宦遊綬遠地人情可否似家鄉  
風雲萬狀接邊庭何日奎垣聚五星爲國爲民君有志莫驚客舍柳青青  
一行作吏到邊庭天上應看聚德星好作清官留政績長教姓字炳丹青

悼亡憶繼室徐恭人

梅花香裏斷鸞絃彈指光陰已兩年淑慎德音何處覓空餘荒塚草絲芊  
初逢如舊意纏繇鴻案高風繼古賢端怪情長年竟促欲將消息問青天  
茶鼎藥爐侍藐躬中宵深賴撫摩功欲知身後思君處風雨淒涼病榻中  
一片真誠孚子心依依膝下戀恩深家庭不演蘆花劇失恃嬌兒感到今  
寬嚴馭下寓微權婢僕銜恩供策鞭曾記彌留猶顧命居停善事囑殷拳  
和氣爭傳姊妹行相逢無異曝春陽席間倘有卿陪坐四座陶然忘日長  
爲迎新婦早經營廚下鳩工泥塊橫丹竈落成人已渺可憐徒費阿姑情  
洞房幽邃燭輝煌兒女雍容拜一堂假使卿身存此日料知欣慰異尋常

附錄基香齋和章

舊絃既斷續新絃鼓瑟鼓琴又一年厚古薄今徒自苦况看青塚草芊芊  
三年緣滿是嬋娟此日空懷內助賢夢裏別君君記否妾身已入大羅天  
淑世有心先淑躬多愁轉恐藥無功蕭條旅館無人伴樂趣還須尋箇中  
客中未便久傷心作客傷心悲轉深一切恩情皆夢幻何須感慨到如今  
教子相夫輕重權居恆勸著祖生鞭笑他悍妬性成者惹得良人奮老拳  
新詩吟罷費經營月上紗窗花影橫今日得新是念舊世間誰似君多情  
同病相憐淚兩行前年埋玉近重陽吾鄉諺語君知否共說好人命不長  
親迎禮節甚輝煌佳婦佳兒聚一堂寄語故人須自慰天倫樂事亦如常

豐州漫遊卽景并序

余爲二豎所擾歷十餘年稊尤無靈扁盧束手計惟選勝尋幽嘯吸清氣或可苟延  
餘生而溷迹市廛甚囂塵上覓一雅靜之區殊覺寥寥丙辰歲授官綬遠此間碧水  
環城綠陽夾岸涼風披拂清氣往來公餘之暇偶出城散步心神頓覺豁爽由是每  
晨往遊藉以服氣久之身體漸健非復疇昔之支離遂率成數章以誌忻慰

居然城市類山林鳥語泉聲萃柳陰到此勾留消世慮何勞蠟屐遠攀尋  
清流芳樹繞城邊獨步脫巾勢欲仙十丈軟紅飛不到綠陰深處聽鳴蟬  
出郭凌晨步向東風和日麗樹玲瓏多情布穀聲聲喚一片蒼煙翠靄中  
柳布綠天泉弄簦簿書餘暇任徜徉天公賜我清涼地到此神歡體欲翔  
彌望蔥蒼萬頃田綠光上接蔚藍天此間噓吸清新氣不服昌陽可引年

選錄友人和章二一首

和詩者爲山左王姓  
其名不復記憶矣

環城樹木密成林曲路欹斜入柳陰此卽桃源堪小隱避秦何事更他尋  
爽氣迎人日正東泉流石上映玲瓏牧童驅犢沿堤過笠影鞭絲旭照中  
過董萬堡

羊牛亂竄馬驚奔爲睹軒車過野村多怪無他緣少見人猶如此獸何論  
遊啣吧莊

廿載光陰夢一場重來此地感滄桑卻欣兵燹荒涼後竟變繁華富麗鄉  
宿和爾蓋

冠蓋重臨舊雨門故人羽化賸兒孫慙無限歡迎意送別猶斟馬上樽

新晴

未雨雖晴不見新晴當雨後迥飛塵蔚藍一色空無際楊柳夕陽古渡濱

清和月自新增堡回郡城

僕僕紅塵拂面來間關客自遠鄉回流鶯巧弄笙簧舌翠柳綠楊夾道栽

仲夏過黃河遇雨

雨滿黃河雲滿山舟人盪槳怒濤間怪他垂釣披蓑者穩坐漁磯似鶴閒

贈萬藜堂

議會宿舍階前舊有牽牛兩叢僕役輩不知愛惜遂致憔悴以盡今歲一本萌芽同人萬藜堂君極力護持爲之牽繩引蔓俄而蓓蕾滿樹鮮妍奪目余顧而樂之賦此以贈

牽牛引蔓倚階栽榮悴由人亦巧哉爲感金鈴勤護惜鮮花次第傍秋開  
羣芳擡舉賴東風不遇東風色總空羯鼓頻催花滿樹三郎妙手卽天工



附錄萬藜堂和章

一枝單弱倚階栽爲惜萌芽謹護哉終是苦心天不負連朝僕輩報花開  
百花顚顛怨東風滿眼繁華總是空天爲牽牛留不盡敢云人力奪其工  
定西張文淵和章

爲惜芳姿手自栽深秋穠豔亦佳哉多情花意如人意不遇知音總不開  
梧桐葉落報秋風蕭瑟蒼涼徧太空弱質緣何偏豔麗人工自古勝天工  
馬琢如和章

枯後牽牛傍砌栽如荆復茂亦奇哉含苞料得重陽近巧伴菊花冒雨開  
倚簷不怕妒花風紅紫聯翩繞半空端賴雅人勤護惜竟憑人力奪天工  
赴鄉圍經老鴉堡

鴉城如斗控雄關雉堞溟濛煙樹間此去金城三百里壯懷直欲奪標還

赤嶺界碑

在今遼源縣境唐開元間與土蕃立分界碑於此嶺

數百年來世大同羌戎久隸版圖中尙留一片開元石赤嶺峯頭臥雨風

蒲月答滄中友人時肄業蘭山書院

一從分襖到蘭垣渺渺河山隔笑言月白風清輒悵惘鴻飛直欲並西鵞  
微軀偶抱采薪災爛漫榴花眼倦開茶鼎藥爐環臥榻他鄉幸有故人陪  
近來學業愧稽遲駒隙光陰轉眼移閱鑑課程依舊日丹鉛點到六朝時  
盲左南華讀一通塗鴉每苦欠精工尙書渾噩葩經麗正在芸窗翫索中  
五峯雅景冠西滄魂夢依依戀梓鄉何日家山重聚首澄華泉上共流觴

約友人遊五峯山

清幽久慕五峯山綠樹千章水一灣仰視羣峯如舉掌崢嶸直上白雲間  
百花爛漫鳥間關樓閣玲瓏傍石巖試望寒泉精舍外分明仙境異塵寰  
煙巖月壑共爭奇撥冗何妨一覽之筆硯須攜行篋裏樹林深處好吟詩  
人生行樂幾何時家術埋頭太覺癡名地須偕名士往登高賦句盡珠璣

詠夢境

岡巒環繞水澄清紅杏綠楊拱一城城外瓊珠天半落危峯飛瀑夕陽明

時朱遠峰兄弟同住蘭山

憶夢詩

寤後枯腸費索搜夢詩僅有一聯留窗前浮翠山如畫池裏飄紅葉似舟

朱家井紀事壬戌經此

此地瘠貧久著名忍看雷雨似盆傾有秋頃刻成泡影隴畔號咷起哭聲  
十家農戶九家貧冷竈無煙甑有塵淒絕啼飢小兒女牽衣阿母喚頻頻

和朱遠峯上元燈詞四首步原韻

人間天上普晶瑩月滿清空燈滿城此夜金吾原弛禁六街士女如雲行牌燈  
千門萬戶慶昇平金鼓聲兼爆竹聲燈火場中作百戲奇形異狀不知名社伙  
行樂人生苦不常環燈射虎興無量錦心愛索黃絹解游戲文星聚一堂燈謎  
燭彩輝煌月鏡圓光明世界掃雲煙馬龍車水星橋下綠女紅男擁萬千遊人

附錄朱遠峯元唱

六街燈火最晶瑩鉦鼓喧闐滿城直與蟾光同不夜恍疑人在雪中行牌燈  
休明鼓吹慶昇平巷舞衢歌雅頌聲巧製魚龍看變化登場粉墨又多名社伙

射鼠射鵬興異常好詞絕妙費思量駢肩瞻望忙如許環繞春燈人滿堂燈謎  
穀擊肩摩月正圓太平境內簇人煙通衢歌舞燈璀璨極樂西方著大千遊人

和朱遠峯迎春梅詩步原韻

試問春從何處來迎春卻綻數盆梅屠蘇醉後朦朧眼笑看金花滿樹開  
三冬溫室費栽培花傍春開如鼓催縱有嶺梅先吐萼春來讓此作花魁  
句萌發達巧乘時草木無知卻有知最愛春梅凌雪放翩翩不待暖風吹  
初換桃符喜歲新枯榮變態似通神名葩本冠羣芳首特冒輕寒綻早春

過拉雞山有序

拉雞嶺爲隴南最高之山余因事赴貴德時已暮春天氣萬山皆綠獨此嶺積雪皎  
然高出雲表斜陽返照彌見晶瑩亦邊荒異景也

攬轡南來入翠微忽驚玉障耀斜暉春山似有怯寒意天半特披鶴氅衣  
萬疊銀屏出翠微異光璀璨射朱暉天公點綴邊荒景特使青山著白衣

宿尕壤卽景

尕壤在拉雞嶺南兩山夾水風景絕佳

煙村錯落依山麓澗水瀠洄傍戶庭積雪未消遙嶺白曉雲初斂衆峯青  
水如碧玉山如黛柳繞孤村杏繞庭隔岸仰瞻飛鳥白開軒臥看遠松青

自朶壤起程南行見綠柳婆娑紅杏燦爛拉雞嶺迤北尙未有也一山之隔其氣候不  
同如此

邊地鶯花自古遲春深不見草離離何圖策馬南行處杏花滿樹柳垂隄

河陰雜詠

倉庚聲裏赴河陰柳色青青榆影深入望梨花千萬樹恍疑白雪滿園林  
萬山重疊擁孤城如帶河流北郭縈本是旃裘游牧地於今四境犬雞聲  
大宗物產屬皮毛美利還推梨與桃負郭有田禾稼少富翁強半是弦高

地本彈丸黑子如城關寥落幾蓬蘆回思小醜跳梁事螳臂儼然欲當車

民國六年呂光勾結番族盤踞縣城

大有圖謀不軌之勢經寧海官軍一鼓滅之呂光被擒獲監獄

屯田積久弊叢生何若升科以募兵獨怪蚩氓無遠識至今猶有怨誹聲

貴德初有屯田八千畝向本寓兵於

農積久弊生往往有田者非兵而充兵者無田前邑令謝滄洲呈准上憲按冊售田按田升科於是屯田變爲民田民兵化爲募兵益賦於公除累於民其舉未可厚非民間怨之愚

嘖堪

文明難啓屬荒陬男不識丁矧女流化蜀幸逢賢令尹裙釵被教等中洲

貴德壤接南番學

一更屬罕事自湘南屈公耀來宰斯邑壽設  
女子國校開校伊始有女生二十餘名

### 附錄鄧星南和章

福星一路到河陰庶士傾風契自深白雪聲高難屬和青蓮只合伯詞林

千山萬壑繞孤城一綫河流玉帶縈亘古未沾王化地今聞比戶讀書聲

點金神術仗皮毛生計還資梨與桃爭羨居奇能致富幾人解道讀書高

欲圖興復竟何如應悔當時出草廬開濟無才輕一試雄心贏得坐囚車

剷除宿弊利民生何用空談紙上兵回憶當年風鶴裏請纓誰奏凱歌聲

沛然德教洽荒陬先導文明屬女流閨閣從今傳盛事名賢政績信無僞

### 河陰竹枝詞

風吹鏡鼓滿城聲是日當年佛誕生試望琳宮香火裏紅裙翠袖比肩行

青蛾皓齒跨雕鞍滿背銀墩亦壯觀卻怪炎雲紅日裏燦如白雪戴羔冠

遺風渾樸女當差粉黛千秋被沒埋邊地無需天足會紅顏隊裏少弓鞋

清和鼓樂聽喧闐岱帝龍君降九天多少疲癯迎輦路伏頭至地意拳拳

長柄腰刀利頂冠荒陬服飾實奇觀披裘五月尋常事只為邊荒暑亦寒

環城地狹牧難求連日飢腸忍客牛直待束裝歸牧地長林豐草任優游

腰橫刀劍背橫槍塞上綠林勢甚狂幸賴軍威今遠讐更無番寇劫行囊

行旅囊足自馬關帥征服探番而此風始戢

黃沙莽莽塞風迢萬里胡天感舊遊此地飛塵常撲面情形髣髴古豐州

綏遠古稱豐州

昔年梵宇助梟雄豕火狼煙徧海東倘使闍黎知自懺年年底事斬年公

津勾結諸番族起蚌湟中各寺僧亦同聲氣朝命年大將軍饒堯率師討平之願後各寺院每作佛事必作年公偶像詛咒而斬妄之以洩其憤貴德各寺僧亦然

何物神牛戲女賓蠢然偃傍綺羅身只緣謬抱宜男想唐突人前不敢瞋

牛形以鼓樂導入婦女場中往來跳舞倘神趨至某婦側作狎愛狀則該婦即受孕生男云

空頭遺俗太荒唐兒女成行只認孃更有一端奇特事摘冠便作野鴛鴦

上辨套謂之戴空頭所生子女知有母而不知有父又番俗每逢大會男女飲歌舞為樂男子若悅某女則摘其冠而走女子隨之便成暫時之夫婦云

釋迦事業本清超金屋誰知竟貯嬌斬絕情絲無慧劍尼陀枉自誦朝朝

此間番僧皆有妻室生男育女與平

異民無

民情渾噩憶從前居近黃河未食鮮今日宴賓烹尺鯉盤餐風味勝當年

諷經療疾久成風佞佛齋僧比戶同不信葳苓能卻病養痾偏愛鼓丁東

靚妝袷服腰無禪文告雖嚴俗尚存恥令旁人瞧下體衣衫祇恐被風掀

番俗四季婦女均不用袴

散下體工作頗不便利前廳官余介舉出示嚴禁卒無效果

屋角高標百尺竿飄搖搭闕繞雲端問稱借彼東皇力披拂空中保治安

番俗立竿牆名曰掛番文長

嘛呢搭闕謂隨風飄搖以當諷誦而召休祥云

纍纍如印掛胸前鑲玉嵌珠色爛然只為護身常佩佛從來虜俗信神權

七七民間禮懺同浮屠惑世術何工宣言預指來生路重返家園作富翁

西郊卅里湧湯泉冬夏儼同烈火煎張幕臨淵為浴室澡身每趁豔陽天

體親施惠久成風慷慨調貧藉飾終多少孤寒同被澤歡聲感頌富家翁

德俗遇親喪必施錢賑濟貧民小康

之家往往以數百緡計此俗尙佳



附錄鄧星南和章

鼓樂喧闐盈耳聲爲祈霖雨潤蒼生年年此日迎神輦習俗相傳自古行  
顧盼生姿跨繡鞍銀墩辮套亦堪觀婆娑舞罷歌聲歇一笑定情許摘冠  
男兒惰嬾女當差紅粉叢殘恨沒埋盈尺蓮船休計較銷魂原不在弓鞋  
娛神鼓樂響喧闐河嶽真靈下九天共祝豐收祈雨水焚香羅拜意殷拳  
馳馬跨刀戴峭冠服妝詭異亦奇觀蒙番不管春秋季一領皮裘度暑寒  
往還咫尺帶刀槍狹路相逢便肆狂計自犁庭除小醜無人膽敢劫行囊  
不分五穀食難求千里運糧憑馱牛幸獲平安歸部落謹呼相慶任優游  
淒煙衰草塞風道蓬轉天涯憶舊遊山水多情留紀念雪泥鴻爪在豐州  
紅黃助桀勢殊雄分道窺邊擾海東逆計無成應自悔何須詛咒斬年公  
謬說宜男誑女竇神牛戲假玉人身踵行故事經年久陋俗相傳信可曠  
空桑出處自高超不染紅塵詎貯嬌何物胡僧輕犯戒陽臺雲雨度昏朝  
無端生子事荒唐胡俗從來只有孃一笑摘冠情已定迎風待月效鴛鴦

酪漿羶肉憶從前不解珍饈異味鮮食譜茶經今見慣古風樸陋笑當年  
附錄趙萬青和章

金饒法鼓並宣聲此日傳言是佛生簇簇爭酬香火願紅男綠女如雲行  
傾城粉黛跨雕鞍服飾輝煌甚壯觀莫道炎天真畏冷新妝卻喜戴高冠  
昔年何事女當差僕僕風塵玉面埋此日堪爲天足式扶牆進步笑弓鞋  
浴佛聲中鼓樂闐神迎河嶽卜晴天善男信女爭羅拜薦醴焚香意甚拳  
居然博帶與峨冠邊外束裝亦可觀畢竟披裘炎夏日蒙茸似畏塞風寒  
山礮牧業實難求野乏生芻飯客牛忍得飢腸歸毳帳茫茫水草任優游  
黃沙白草塞風道邊景荒涼憶舊遊河外驚飆連早暮蘋蹤疑似到豐州  
人尙兇橫械尙槍綠林肆劫勢猖狂邊庭幸有高舒翰殲取匪頭似探囊  
紅黃附逆勢渾雄幸仗軍威靖海東事隔百年懷宿憤許多蘭若咒年公  
賽會酬神集女賓毳羶矯作一牛身紅顏隊裏恣遊戲謬想宜男忘怒曠  
清淨僧規本自超誰知梵刹有阿嬌塵心未悟空中色枉把彌陀誦夕朝

閨女生兒本突唐不知有父只知娘而今恥效胡中俗絕少家雞配野鳶  
天然食品味從前羶肉祇知一味鮮今日鱸魚新釣得烹來宴客勝當年  
附錄寧贊丞和章

浮屠蠢動附奸雄徧地烽煙寇海東可怪闍黎不自反至今洩憤斬年公  
神牛賽會集來賓謬說宜男戲女身年遠頽風難挽救人前狎暱不生瞋  
羌胡遺俗實荒唐閨女無端便作娘此日文明邊地啓男婚女嫁配鴛鴦  
解脫紅塵教自超琳宮豈得暗藏嬌情枷愛鎖難拋棄枉供如來拜夕朝  
風氣開通大異前邊荒珍味有魚鮮河濱慣見垂綸叟釣得金鱗度歲年

夢母有序

余羈旅河陰遇 先慈忌日不獲躬親展墓爲之悽惻者久之是夕夢 先慈躬自

展衾作將寢狀視其被羈且垢不禁慚悚交集蹙然而寤回憶夢境宛在目前亟  
函囑 蔚兒製冥用衾裯詣墓焚送聊伸區區孺慕之忱

嘗罷熊丸踰廿年甜鄉會晤淚潸然爲憐舊被作新被是否丹忱達九泉

秋日散步口占

避囂汗漫步郊原黃葉蕭蕭繞野村  
老景逼人如此樹欹歎撫柳繼桓溫

附錄基香齋和章

交情肝膽憶平原詩話風流愛雨村  
開徑遙瞻三益至不披綿纈體猶溫

癸亥歲重修通濟橋工竣官紳落成於倚虹樓觸景率成二章

鼉梁隆起勢如虹翠檻朱欄繞半空  
碧柳陰中形隱約畫橋宛在畫圖中  
濟濟冠裳萃倚虹憑欄眼界一時空  
梨園遠度河千曲風送笙歌入座中

誌夢中詩一句有序

余嘗夢中作詩遙吟俯唱逸興遄飛寐後僅記得碧海一句又在可解不可解之間

援筆誌之聊博一粲

可笑新詩夢裏吟醒餘興致尙漓淋  
片詞僅記追維後碧海青天鑒此心

和朱遠峯殤孫原韻

老弄孫兒似掌珠最憐學語語含糊  
有時咿啞牽衣笑解悶差強酒一壺

正是斑爛戲舞天哭聲幕地出門前仁人終衍螽斯慶不過含飴晚一年

惡病

身伴藥爐兩鬢斑朝朝暮暮少歡顏何如一瞑成千古萬事捫心漠不關

附錄基香齋和章

善病工愀髮已斑每憐無術換童顏客來自覺周旋苦長使重門晝掩關

附錄朱遠峯和章

老年朝鏡鬢痕斑面何妨笑醉顏日涉園林成樂趣雙扉雖設竟常關

喜病

誰知止足澹營求漏盡鐘鳴苦不休倘使微軀真老健飢驅可免出門不

附錄基香齋和章

克家有子復何求病已垂危吟未休詩卷自茲成絕筆新詩再續九原不

附錄朱遠峯和章

甚解讀書不願求浮雲富貴早年休杏花村裏新醅酒惟問明朝熟也不

## 五言排律

送蔚兒赴滬上職業教員養成科肄業

遊子驪歌唱嚴親  
訓殷讀書求實用  
講學忌空文  
務廣名難就  
貪多志易紛  
利權收製造  
工業勝耕耘  
旅次時防疾  
人生總貴勤  
師資儲校序  
生計關榆枌  
服飾羞豪侈  
光陰惜寸分  
膚功基胼手  
大任始勞筋  
比德雄風著  
維廉霸略聞  
躬爲皇帝貴  
習藝尙慤慤

過崔家崖

何處無崖峙  
茲崖獨擅名  
樓臺連頂踵  
金碧燦縱橫  
磴道盤空際  
雕甍轟太清  
窗含千嶂靄  
鐘落九霄聲  
境有凌雲勢  
人懷出世情  
塵緣如可卻  
留此學長生

題王復初先生實錄後

丕績彰青海  
髻齡耳盛名  
八團勞碩畫  
百戰保危城  
出境摧狂虜  
援鄰整義兵  
功高讒口滅  
勳著衆心傾  
決策超儕輩  
聯羣本至誠  
奇才誇道署  
雄辯動湘營  
祀享鄉賢列  
英蜚邑乘聲  
望同諸葛重  
累葉有餘榮

壬戌上元燈節

閣帥招飲衆賓於公署爲第六次消寒會適座間有迎春梅二盆開

花甚茂卽以命題不拘體韻 逸章率成五言排律一章藉以塞責

戟署文星聚瓊筵廣廈張春觴飛玉白梅藥綻金黃燭燦元宵彩花飄滿座香衝寒觀蓓蕾  
司令值勾芒清品超穠李紅粧陋海棠妍羞爭萬紫華本冠羣芳侶結孤山畔芬流大樹堂  
靈根依勝地正色應中央

遊河陰南海殿

殿在貴德城南山半  
爲邑中名勝之地

隨喜登琳宇胸襟頓滌煩千峯環翠黛四境曠川原滿座涼颿拂盈郊麗日暄綠雲禾徧野  
碧幕柳當門城闕排平地榆楊隱衆村樹間鶯語碎階下澗聲喧山靄浮衿袖花香泌酒罇  
盤桓消永晝身恍住桃源

附錄鄧星南和章

散步臨仙境飄然脫俗煩層雲封遠岫曲水繞平原簾幕微風動窗櫺麗日暄嘉禾盈  
四野苑柳映千門宛轉花間路依稀樹裏村鐘聲空際落鳥語靜中喧遺興宜棋局消  
愁藉酒罇紅塵疑隔世此地卽桃源

附錄寧贊丞和章

結侶登仙宇尋幽敢憚煩萬峯窮一覽兩澗潤三原簾捲和風拂窗開麗日暄新青禾  
徧野濃綠樹遮門九曲城邊水孤煙柳外村雲霞空際斂鳥雀靜時喧寄興聯詩句消  
愁借酒罇山川如畫裏此卽小桃源

王氏花園水心亭小飲

但得清幽趣何須酒饌豐綠陰籠左右碧水抱西東精舍三楹敞孤亭一徑通波光環檻白  
藥影繞階紅暢飲忘賓主言歡雜叟童筵開明鏡裏人在畫圖中竹密消炎暑荷香送暖風  
雞聲花外唱鳥語樹間工雅境真難獲塵懷頓覺空歸途循隴畔麥浪賞玲瓏

附錄趙萬青和章

尋得清幽地亭軒不在豐碧波環左右綠水遍西東樹密濃陰合林幽曲徑通當庭槐  
蔭翠繞砌藥翻紅境似塵寰外人疑草閣中清心茶共飲戰拇酒頻空正好棋消夏無  
煩扇引風鶯聲何處碎鳥語此時工列座無賓主歸途有叟童披襟餘醉興爽氣挹玲  
瓏

附錄寧贊永和章



結侶尋幽處無須飲食豐  
午槐陰上下流水繞西東  
蔀屋簾初捲茅亭徑曲通  
樹濃波映碧欄淺藥翻紅  
舉爵兼賢聖來賓雜叟童  
安棋消永日拂扇引清風  
酒熟黃梅後筵開綠鏡中  
譜薰琴韻叶喚雨鳥聲工  
入座塵懷滌披襟俗慮空  
歸程斜照裏夾道柳玲瓏

### 七言排律

夜長不寐賦此消遣

勞擾風塵今始休  
桑榆景晚更何求  
試看大局同危廈  
竊比前賢愛枕流  
燕粵嗟成冰炭勢  
田園願訪笠蓑儔  
權將城市作巖岫  
敢用泥塗眎冕旒  
詭卻喜催租無悍役  
只緣善病冷封侯  
林泉選勝偕童冠  
寒燠因時易葛裘  
萬綠叢中聽鳥語  
百花香裏抱孫遊  
芳晨小酌開陶徑  
月夜清談倚庾樓  
老圃攜鋤勤蒔種  
名山載酒任勾留  
迂疏性質厭羶附  
耕讀生涯貽燕謀  
伏案揮毫消寂寞  
推軒把卷度春秋  
天晴雨能高臥身  
卸簪纓幸自由

### 四言詩

追悼徐暉南校長

鳳山蒼蒼麟河泱泱挺生人傑如圭如璋髻齡穎悟翹楚膠庠學尊濂洛書仿鍾王性情舉  
止謙謹安詳尊師重道大類游楊歡承鳩杖春滿高堂篝燈課讀教子義方居閒著述大筆  
琳琅勇於爲義毅力熱腸茫茫青海古稱氏羌民愚而懦地廣而荒西鄰覬覦勢已履霜富  
軸憂之思患預防藩籬欲固文教宜昌延君司鐸興學梓桑氎裘萬帳選俊來遑宏開大廈  
羅列縹緗慤誨諭風雨不遑屢蹶屢奮辛苦備嘗滿門桃李斐然成章始基旣固更圖擴  
張經營師範意美法良宣勤十載功效昭彰事多食少病入膏肓彌留之頃伏枕徬徨拳拳  
校務語重心長文星旣隕天日無光親衰子穉家境淒涼躑躅哭泣目慘心傷誼關葭萼含  
殮趨跲執紼臨穴感喟蒼茫程門戴德誼篤心喪招魂絳帳酒醴芬芳燦陳祭品荔丹蕉黃  
精誠所感靈旆央央雲車風馬來饗馨香諸生英俊壯志激昂追維往訓日就月將學成返  
籍敷教邊疆山陬海澨絃誦洋洋文明大啓師志克償九原可作忻慰無量是爲報德勝醴  
酒漿

王母趙太孺人懿行贊

樓山北峙滄水南流篤生賢媛不媿好逑好逑伊誰曰趙太君端莊淑慎素著令聞嬪於丹

邑佐復初公鹿車鴻案有孟桓風遭逢不偶變起花門夫被公推防務紛繁孺人慨然家政  
獨肩春耕秋穫躬履陌阡大會謀變禍將流血決策赴難女中人傑十載干戈不遑假寐謹  
侍所天精神况瘁大難將平夫紿微纒昕夕授餐相對悲惻公庭鞠訊危乎其危雷霆斧鉞  
冒死追隨嗣賦黃鵠茹蘖飲冰撫孤成立先業克承吁嗟孺人備嘗艱苦愈苦愈烈裙釵罕  
覩赤嶺嵯峨青海澄波山水永在淑德不磨

詞

歎病夢江南

身多病彈指十三春飲食不甘眠不穩膚肌削瘦骨嶙峋日與藥爐親

又

回頭想少壯幾何時半世工愁兼善病此身未老已支離撫髀每含悲

悼殤孫人月圓

笙歌如沸燈如晝適際一年初天胡厄我當茲令節淚灑襟裾連宵感夢蹣跚學步啞  
讀書恍如平日清晨繞榻向我歡呼

又生查子

前年春節時燈綵千門燦風雪槁蘭芽方寸如絲亂  
今年春節時燈綵依前爛又瘁一蓀  
枝令我肝腸斷

憶舊望江梅

難再得最是少年時回首棘闈鏖戰日揮毫終夜不知疲精力妙能支

又

飢驅我曩作塾童師洗腆庭幃資館穀偷閑文史手勤披味藉夜燈知

又

年乙未烽燧徧河滄只爲鄉關遭劫運鳳林乞救犯風霜並且冒鋒鋌

又憶先內子王恭人

千百恨半世歷艱辛方享京華清貴福何圖遽作九原人歎忽十三春

又憶先繼室徐恭人

鸞絃續燕婉甫三年詎料臨盆成永訣傷心端在小陽天十載恨絲絲

又

風鑑說大足誤功名百載鹿鳴成絕調錦標我竟奪金城有志事終成

又

癸未後捷報寂南宮笨伯天生何傲倖禮闈一戰竟成功竽濫部曹中

又

光復始本擬隱林泉三徑無資謀斗祿烹鮮小試到胡天心力瘁烽煙

時盧涇滋擾地方糜爛官軍堵剿邑宰疲

於供

### 小園二十八景各詞序

余於民國八年闢園於本宅東偏鑿池開畦蒔花種竹閱三四年居然萬紫千紅滿園錦繡稍暇即徜徉其中藉遣悶懷日涉之餘分園景爲二十八每景各填一詞亦消遣韻事也茲臚列各詞如左

### 芳護夾徑畫堂春

小園夾徑喜蔥蒼芳護森立成行天然翠幄臨風張任我徜徉 此草忘憂著世我今但愛

芬芳祇愁雨後來  
翩翔零露沾裳

翠柳環池前調

翠煙細柳鎖蒼茫  
柳間一片波光垂  
枝倒影任游揚  
宛在中央  
瞥見蒼雲半畝  
誰知中有  
池塘遙從樹際見  
鴛鴦游泳斜陽

茆亭凝翠清平樂

茆亭何有四面圍  
槐柳翠靄浮衣且  
映酒時與良朋聚首  
綠陰宛似屏障  
炎天不憚驕陽  
晝永憑欄覓句  
居然人是羲皇

瓜架生涼前調

濃陰覆冒廣庇同  
堂奧此地塵囂不  
克到只有蟬聲聒  
噪  
恍疑翠幕高懸  
豆棚風景同妍  
有客偷閑品茗  
渾忘赤日行天

朝曦窺牖搗練子

西垣上啓雙軒  
早起推窗旭日暄  
巧趁清晨來送  
暖憑軒快賞露  
花繁

皓月點波前調

風定後雨晴時雲斂天空月照池飽飯黃昏池畔立一般清趣少人知

井欄消暑醉桃源

困人天氣午晴時炎敲不可支納涼賴有井欄依蕭然爽四肢  
茆簷外薜蘿圍綠陰當翠  
帷輕羅小扇不須揮逍遙坐夕暉

花洞藏春前調

三郎羯鼓幾番搗催開上苑花何如花洞養名葩寒天豔似霞  
風雪裏賴簾遮芬芳滿眼  
華招徠墨客與詩家常停戶外車

關畦種菜踏莎行

海錯山珍俗流共寶豈知不及園蔬好食愈澹泊體愈強勝餐那鳳肝龍腦  
關地成畦芟  
萊刈草秋菘春韭栽培早咬根能碎味名言先民竊與同襟抱

引水灌花前調並押前韻

娛目怡神人間至寶閑來惟有看花好百般紅紫鬪春風遊觀處快人頭腦  
時灌清流勤  
除茂草惜花要起三春早却欣渠水到花間園中有甕無庸抱

黃梅匝樹憶王孫

清和時節雨如絲醞釀黃梅花滿枝拄杖窺園雨過時趁晴曦一片金光耀日眉

紅杏出牆前調

杏花絢爛向春風高出牆頭點點紅紫蝶黃蜂鬧半空賴天公畫景當前點綴工

一隄梨雪採桑子

風和日麗春光好杏靨爭妍桃粉含煙忽現花飛六出天綠雲湧出團團雪醉笑風前兆  
卜豐年不道梨花綻萬千

三徑竹風前調

炎炎夏日人殊困避暑來園三徑流連通體清涼勢欲仙只好竹引薰風至赤日雖懸却  
異炎天嘯傲綠陰似七仙

臨流視鴨阮郎歸

池塘半畝遇春晴風和水自平雙雙浴鴨泛波行時聞唼喋聲攜美酒傍溪傾人來鴨不  
驚雌雄逐隊影縱橫清流似鑑明



傍柳聽鶯前調

三春樂事屬聽鶯珠喉嬌且清綠陰深處轉嚶嚶笙簧舌鬪成  
新雨後夕陽明脫巾傍柳  
行天然鼓吹動詩情勝聞絲竹聲

花香入座荊州亭

養得百般麗質馥氣滿園揚溢熙攘笑蜂忙鎮日搨花釀蜜  
良友談心促膝一片花光耀  
日滿座散清香只爲微風入室

藤蔓覆簷前調

構得數椽茅屋繞砌廣栽花竹藤架傍簷牙碧蔓凌空攢簇  
翠幔天然成幅渾忘時臨三  
伏氣味若新秋人在北窗坦腹

塔峯聳翠鷓鴣天

怪石嵯峨成小山居然萬壑與千巖羣峯羅列塔峯聳妙景蒼茫煙雨間  
層疊處草繇芊  
綠光上接蔚藍天閒來凝碧亭前立一幅丹青望裏懸

哇果綴紅前調

種得林檎數十株入園彌望樹扶疏秋來徧結枝頭果仰視纍纍如貫珠 風澹蕩雨涵濡  
綠丸漸漸化爲朱梨黃楸紫相輝映風景依稀似畫圖

蜂喧紅藥巫山一段雲

夾砌紅雲燦當階錦浪翻嬌姿妖豔被風掀馥郁散盈園 香溢羣蜂集花間鎮日喧聞來  
相對忘塵煩身恍入桃源

蝶醉碧桃前調

杏靨紅方褪碧桃幸吐華含苞初綻爛如霞麗景令人誇 雨洗嬌容淨風傳馥氣賒穿花  
峽蝶影交加心似醉名葩

小樓品茗烏夜啼

昔寓京華數載公餘選勝徜徉大觀賓宴勾留徧風味最難忘 一自家山歸臥構樓園圃  
之旁春秋佳日覽園景淪茗倚紗窗

精舍彈棋前調

構得三楹精舍賞花飲酒相宜圖書鼎彝安置蹈隙便棲遲 平日以文會友有時乘興

彈棋雌雄未決心殊壯酣戰日斜時

雪中翠柏浪淘沙

寒氣滿乾坤六出繽紛瓊瑤世界絕纖塵惟惜衆芳搖落盡惆悵園亭  
翠柏上干雲氣概  
森森蒼然特現後彤身雪地冰天不改操令我心欽

雨後綠楊前調

楊柳曉風時搖曳生姿少年張緒比相宜不道園林新雨後景更希奇  
露重翠條低煙鎖  
迷離塵埃洗盡萬千枝一片綠陰芳靄裏妙囀鶯兒

小橋春柳歸田樂

溶溶淪水流園裏上有虹腰隆起時值暮春天細柳環橋濃無比  
陽和風暖綠陰美中有  
鶯兒燕子拄杖立橋頭格磔清音滿人耳

古刹清鐘前調

喧闐人海厭城市雅愛深山古寺數畝小園中卻有山林清幽致  
瑩煌金碧綠楊裏曲徑  
通幽迤邐清曉一聲鐘韻繞花間鳥驚起

附錄余永年和歎病夢江南二闕

扶桑木不計萬千春苦暑淒寒偏健挺五風十雨兀嶙峋常與雲霓親  
病也好不問今何時百幻煙雲人懊惱一天風雪月迷離到眼不勝悲

余永年和悼殤孫生查子一闕

繩繩會有之貯見門閭燦尼父亦遲孫乃者如麻亂 行樂及今時處處春光爛倚  
杖覓錫聲毋令杯中斷

讀惜陰詩草有感調寄浪淘沙

家學溯青蓮筆大如椽古風近體兩超然更有新詞臻絕妙不惡坡仙 意致最纏綿  
磬澈鈴圓多愀善病每經年詩卷長存人已渺我見猶憐 教弟基生蘭謹題

清封中憲大夫先考文齋府君行述

先嚴諱煥章字文齋號奮生又號惜陰軒主人 先祖父均卿公之長子世居甘肅西寧縣雲谷川劉家堡少時由均卿公躬親課讀稍長就外傳時家中簞瓢屢空晝粥猶斷遑論學俸而 先祖奔走告貸終日無所得涕泣道中者屢矣猶復連日四出假借有所得卽接濟塾中除供束脩外以所餘購置筆墨食品祇有炒麵而常慮不足其困學也可知年二十一補郡學生員以故人誼 先嚴爲炒麵秀才而 先嚴耿耿不忘兼之風木餘哀時對成蔚等道及之輒泫然淚下光緒乙未之變新添堡被圍 先嚴奮然曰與其坐以待斃不若捨身求救遂與 先堂叔忠遜夤夤夜墜城而出奔赴河州董營乞師因繞小道步行兩足皸瘃痛不可支及後步履維艱職是故也亦以餐風宿露之苦抱有痼疾迄於半生嘗語蔚等曰此余請兵紀念也迨回湟新添堡已破 先祖母趙恭人及堂伯忠信胞叔忠謙均殉難焉辛苦之餘兼之悲傷痼疾於是乎深亂平卽設帳鄰村以資餬口仍於教讀之暇刻苦自勵雞鳴而起書聲朗朗諸弟子亦步亦趨故多好學能文之士如汪君瑞亭馬君琢如陶君銘菴吉君馨山等皆高足也每歲館穀所入盡歸諸家中以爲經營農業之需 先慈王恭人

亦善持家日漸小康旋受知於夏學政肄業蘭垣求古書院祇知潛心文史而於飲食衛生以境遇關係不暇講求日以軟麵麵片充腹此胃疾之所由起也及後家人每食麵片先嚴殊不願入口含笑語蔚等曰此亦余坐書院之紀念也後又肄業於滄郡五峯書院未幾以癸卯科舉人資格調入省城師範館於算術代數及一切科學仍孜孜不倦至今諸課藝抄本手澤猶存畢業旋里卽創辦西寧縣立高等小學堂風氣未開人多以洋學堂呼之先嚴循循善誘浮言漸息丁未會考廷試一等籤分度支部制用司主事遂攜眷晉京成蔚隨侍焉從此部曹清貴公退之暇仍於詩書中討樂趣時部設計學館先嚴又肄業焉以爲簿記之學其法簡而其用廣也宣統二年先慈謝世先嚴哭之哀飾終之具備辦周至寄柩於老牆根之廣惠寺隨時率成蔚祭掃適逢覃恩加四級誥贈中憲大夫并追封三代成蔚年方冲幼先嚴卽命讀時務三字經史鑑節要等書至北京寒暑假中始命加讀古文詩禮及四子書并爲之詳細講解務使明白義意不專重背誦是先嚴教育子弟由淺入深非泥古不化者比辛亥光復先嚴悲時局之驟變歸心如矢遂於民國元年率成蔚扶柩由太原約同朱遠峯父子取道北路旋里先爲縣議會正會長又爲教育會正會長

及車公子權羅公子衡觀察海東均委以內務科科長苟有益於地方者無不極力興辦無所顧忌在教育會長任籌辦西寧女子學校并第一次小學成績展覽會觀者如堵頗極一時之盛人皆稱爲西寧創舉旋由羅公以縣知事保免試驗分發綏遠卽蒙委任懇務局科員繼由綏遠道尹申委任歸綏縣知事適值新舊都統交替之際差供浩繁賠累二千餘元因申道尹不允作正開銷故也後申道尹所欲不遂以已交之司法經費迫令重交竟命後任軟禁時蔚肄業京師民國大學先嚴以正當證據向都統公署司法處起訴一面寄呈到京命蔚轉遞內務部平政院迨水落石出申道尹假託中風不語不敢出庭而先嚴覆盆之冤得以昭雪然從此灰心仕途卽請假旋里道經京師忿怨之心現於辭色以爲官場決無公理非我所宜處也急流勇退不俟終日抵里後應甘肅省議會第二屆議員凡人民請願無不極力維持官吏之貪黷者無不依法彈劾時成蔚旅學滬上中華職業學校因歸期遲遲有雨中憶遊子詩情詞悲惻讀之涕下先是成蔚臨赴滬時有送蔚兒赴滬上詩教愛兼至并以尊重勞動勉之先嚴思想之新於此可見民國十一年蒙甘邊寧海鎮守使馬委辦貴德皮毛事務地僻事簡遂專心纂修家譜爲先曾祖豐伯先祖父母及先伯

叔諸姑姊等一一作傳以致勞心過度宿疾大發河陰邊地并無良好醫藥不得已暫以阿芙蓉救急是歲八月十六日生弟成萼 先嚴聞報悲喜交集旅次聞添丁詩有雛鷓長大知何日願了向平賴鶴令之句似預知不能享壽故作此沈痛語也冬季回里途中吐黑水數碗抵家臥病幾不起幸極力療治胃病稍愈謂成蔚曰我連年臥病一旦朝露我三十年前之素願不克償矣卽於十三年春日命成蔚夫婦赴鄉在祖墓新塋建立碑碣不時函諭叮嚀務使完善以垂永久古曆九月初三日僕人王勤來奉讀手諭歷述最近病狀勢極危險成蔚卽日來城省視見 先嚴面貌浮腫而骨瘦如柴小腹又膨脹似盆幸飲食有味先嚴曰此余一線生路也是晚與蔚談修墓事甚詳以克償素願喜形於色腹竟不脹次晚仍痛脹如初大小便均不通利而成蔚因鄉間工程未竣第三日早匆匆赴鄉將修墓材料收拾清楚卽於十三日攜眷回城 先嚴抱孫兒友昉愛不忍釋喜曰數月未見已長如許大矣旋服人造自來血大便利而小便仍難延醫調治頗見功效以爲已有轉機故於臨終之具一無準備不意至十四日面部浮腫愈甚至十五日清晨已痰塞不能語服以補劑及消痰藥均罔效竟於十六日亥時捐館享年五十有七附身附棺之物倉猝製辦諸多簡陋



傷哉方以症轉須臾未得奉有遺囑爲憾乃於書閣中檢得小冊分囑後事有條不紊於子弟輩讀書一層更懇切言之曰萼兒外濁內秀昉孫內外俱慧爾異日務使兩兒讀書成人勿墜先業是所願也 蔚等見之更覺心肝欲碎嗚呼痛矣 先嚴賦性寬厚而處置事務守正不阿從政廿年無時不以憂勤惕勵爲懷手不釋卷暇則以吟詩作字爲樂平日自奉儉約律已嚴而待人恕毫無仕宦氣習著有寡過堂日記惜陰軒詩草惜陰軒詩話弁言實業雜記等家譜序中尤以置祭田立宗祠創義校購義田以爲有志未逮諄諄囑之後人此先嚴於敬宗收族之道特爲重視予小子何敢忘之元配 王恭人沈默寡言 先嚴肄業郡城蘭垣時家政悉由 先恭人處置罔不綱舉目張縫紉烹飪之必躬親操作猶其緒餘及至京師人地生疎且思念 先外祖母甚切居常鬱鬱以致病入沈疴於宣統二年正月十二日疾終京寓享年三十有九生子一卽成蔚也繼配係清武都尉徐公獻章之季女優貢生兼雲騎尉世職輝南先生之胞妹也因產育殀亡子女無出再繼室氏杜生成萼女二孫友昉均幼

不肖子李成蔚謹述 乙丑年春日

這本詩草，是先嚴生平心血的結晶；先嚴對於各種文體都有研究，到了中年以後，差不多拿詩當作充飢的麵包，治病的藥餌，解煩悶，解痛苦的良友，以度那爲「病魔」所苦的歲月；青年時代的作品，遺失的也不少，晚年所作，却一點沒有散失掉。

作詩本是一種「暢情適性」的事，凡是得意的作，很願意送給「志同道合」的朋友們，再三吟唱；所以去年先嚴很想極迅速的把這本詩付印，也是「以公同好」，並沒有甚麼「藉以傳名」的意思。先嚴常對我說：我近年呻病魔糾纏，養病的餘，就以作詩消遣，也覺得是苦中的樂，我很想把他早點印出，藉我在世，請朋友們指正指正，這也是你養志的一道。

咳！我去年因爲到鄉間在祖墓建立碑碣，奔走城鄉，又因爲經濟方面太覺掣肘，就把這件事推延了好久，以爲「先嚴纔是五十多歲的人，那裏就會謝世呢？明年趕辦也來得及，」誰知病害得一天比一天重，就在去年的十月不在了；沒有等得墓工的完竣，更沒有眼見詩稿的印刷；我想到這裏，心肝真要碎裂了！

到了今年春天，我又奔走於墓工，還是被「忙」「貧」把我限制着，沒得辦這件事；但是心上覺得時時催促道：「你把老人耿耿在心的詩稿，還不付印嗎？你問心得過嗎？」簡直

是「寢食不安」。

墓工竣後，我就尅口減腹，勉強寄交上海商務印書館把這詩稿代印起來；此後良心上，或者稍微安穩些，但是先嚴已不能親眼看見，也不能使他老人家愉快了，這種難堪而無可如何的痛苦，何時纔能離開我的「方寸」呢？天呀！「貧」和「忙」，也能使人「抱恨終天」嗎？

民國十四年冬日兒成蔚誌

